

文苑英華卷第六百三十一

狀四

謝恩四

壽昌節謝酒食狀一首

嘉會節宰相謝酒食狀一首



中和節謝賜尺狀一首 清明謝賜火狀一首

為人端午謝賜物等狀四首

社日謝賜羊酒海味及茶等狀一首

重九謝賜餠酒等狀一首

臘日謝賜物狀一首

壽昌節謝酒食

集作宣宗茶酒狀生日

杜牧

右臣某等言伏以大慶吉辰榮霑錫宴鴻恩繼至王人荐

文苑英華卷第六百三十一

徐



鹽日酒名肴集作茶玉食仙果來於御府莫匪天慈適口忘  
憂已滿小人之腹殺身粉骨難酬聖主之恩臣無任感恩  
抃躍之至

嘉會節宰相謝酒食狀

昭宗生日

錢珣

右伏以香火至誠祝後天於萬歲絃匏飾喜會率土於三  
春敢望宸衷恩隆輔弼王人逋一作墮一作隆寵錫爰加酒醞既  
陳炮燔兼至名茶馥郁嘉果駢羅葷珍而食指先驚敢忘  
盈滿竊位而憂心已醉寧待獻酬仰望睿慈臣某等無任  
兢感懼抃屏營之至

中和節謝賜尺狀

白居易

右今日奉宣賜臣等前件紅牙銀寸尺各一者伏以中和

戒集作節慶賜申恩當晝夜平分之時頒度量合同之令

况以紅牙為尺白金集作為寸美而有度煥以相宣逮下

明忖度之心為上表裁成之德慶澤所及歡心畢同臣等  
塵忝日深寵錫歲至雖恩光下濟咫尺之類不遠而尸素  
內慙分寸之功未効捧受愧畏倍萬恒情謹具奏聞謹奏  
清明謝賜火狀

前人

右今日高品官唐國珍就宅宣旨賜臣新火者伏以節遇  
藏煙時當改火助和氣以發滯表皇明而燭幽臣顧以賤  
微荷茲榮耀就賜而照臨第宅聚觀而光動里閭降實自  
天非因榆柳之燧仰之如日空傾葵藿之心徒奉恩輝豈  
勝欣戴



為人謝端午賜物等狀

令狐楚

右中使王進卿至伏奉詔書慰問臣兼宣恩旨賜臣及諸將衣弁百索銀器等者臣伏以夏之為仁寔由乎長養王者所寶莫重於賢能故事將錫長年皆於今月因頒琬琰遐及庶方誠上帝之殊私信天朝之盛典臣才無所取政不足稱獲守司存已為尸忝豈意九天之慶賜每歲必來五日之祥期一作棋祥無年不受衣裳霧疊詔書雲繁篋中盈綵絲之索案上浦真金之器方圓通用紅紫交光命輕而服拜難勝身賤而鋪塵不藉以榮為懼當喜而憂終無補於成功空有慙於僭賞並准勅奉受兼分給諸將訖所守有限不獲陳謝

為安平公謝端午賜物狀

李商隱

右今月某日中使某至奉宣恩旨賜臣手詔一通兼前件端午紫衣銀器百索并大將衣者乾文昭融睿賜稠疊恩生望外榮積懼中臣已當時宣布給散訖伏以正陽令月端午佳辰渥澤合止於勳賢錫賚宜先於戚屬臣遠臨東魯久去上京豈望仁時同躋壽域八行明詔伏讀而不啻千鈞一襲輕衣跪捧而若無三伏况又綵縷出仙蠶之質貞金凝姪女之魂持可戒盈帶堪延筭豈微臣獨忝在列校不遺華楚成行永願千春而奉聖綿長共保常期五日以霑恩臣與大將等無任感激懇悃之至

為榮陽公端午謝賜物狀

前人



右中使某至奉宣恩旨賜臣端午紫衣一副百索一軸銀  
器二事大將衣三副并賜臣手詔一通者伏以五神定位  
祝融司長養之功六律鈞和蕤賓有酌酢之義故節推戴  
禮日著漢儀彼艾人遠具於歲時角黍近標於風土乃耆  
舊傳聞之末亦集作是君親慶賜之原伏惟皇帝陛下克協  
樂章允符時訓恩集作仁霑近戚惠浹元僚臣守介蠻圻程  
遙鳳闕敢希瘴嶠特降乾文輕縞染衣真金備器海綃掩  
麗渠盃藏珍拜受若驚跪捧如失嘗衣國僑之紵被服多  
慙久携顏氏之瓢捧持未慣當晝而不假交扇向日而唯  
宜飲冰况又將以綵絲縈諸畫軸用襍故无集作善續收齡爰  
自微臣頗流諸校鞠躬被寵全踰錫帶之榮觀物傳輝實

動請纓之思唯當仰承帝力粗舉藩條誓相率於明時庶  
同登於壽域臣與大將等無任望闕感恩抃舞屏營之至

謝賜端午衣物狀

張次宗

右伏以中暑良時沐蘭令節王人乘驛初降於九霄內府  
頒衣遽霑於千里臣忝膺寄任未展滄埃節候每移尸曠  
增懼陛下殊私荐及寵賜不忘天書觀經緯之文麗服見  
裁縫之妙捧其珍玩價重於兼金賜以綵絲恩深於延筭  
况罷周將校問及偏裨爭馳就日之誠益勵酬恩之節

杜日謝賜羊酒海味及茶等狀 常袞

右中使某至伏蒙聖慈賜前件羊酒等臣謬塵重任已積  
歲時日有餐錢月受高俸過蒙温飮常愧有餘內省謀猷



實慙不足益彰尸忝深誠滿盈屬上戊御辰勞農報社賜  
兼海陸品極珍鮮上減御殮一作下豐私室何功而受承  
寵若驚惶恐拜恩戰懼交集無任戴荷欣抃之至

重九謝賜餼酒等狀

前人

右中使劉君壽等至伏奉恩命賜臣前件餼酒等仍令樂  
飲者伏以玄月戒時清風應律宜於長久欣聖祚之壽昌  
復見芳華喜陽數之重合時恩忽降節賜特加王人寵臨  
御膳分旨膏以粉餌蒸以饴餼綠芋金棗紫蔗筠節茱萸  
清酒嘗聞舊俗之傳蕙苾調腸今覩靈珍之味此饗人苑  
更上獻嘉辰豈伊凡品微生下霑殊貺賜宴既聯於伯仲  
覃恩更及於室家稠疊寵光低迴殞越一門同慶萬死何

酬

臘日謝賜口脂曆日狀

鄭綱

伏以王人戾止天書遠降於閩川星躔既回黃曆猥頒於  
遐服推步允符於聖祚先天克合於歲功三百六旬斯頌  
而咸覩二十四氣瞬息而可知一作又賜以蘭膏錫之絳  
雪衆香流澤芳潤忽光於悴容五藥蠲痾瘴藹潛銷於腠  
理仰榮知忝承寵益驚聞闔九門歲時結戀於雙闕方隅  
萬里展効期激於丹誠敷惠未洽於遠人拜賜濫同於重  
鎮觀風察俗志有立於消塵比物省躬恩何酌於覆載臣  
某不勝歡躍屏營之至

爲昭義李相公謝賜臘日口脂狀 崔行先



右中使某至伏奉勅書墨詔緣大禮後慰問臣及將士官  
吏等又緣近臘日便賜臣前件藥物臣謬履鈞衡守茲戎  
鎮星霜屢改溼澤逾深內悚外慙不知所措文明啓運殷  
荐告成郊廟展嚴禋之儀蒸黎洽時雍之化大宥五刑之  
典廣霑萬物之恩自天有慶與人更始臣名器俱忝宸睭  
曲臨節近嘉平恩延寵錫香膏凝潤於寶器上藥秘重於  
仙方澤變衰顏不知老之將至光生僊質空驚疾乃有瘳  
祇奉舊章式披新曆想天長而地久看日往而月來無任  
云

臘日謝賜口脂紅雪等狀

前人

右中使某至伏奉手詔慰問臣及將士等又緣臘日賜臣

口脂紅雪并新曆日等伏以蜡節嘉辰載於六籍皇恩隆  
洽賚及萬方金膏不秘於上清蘭澤遠傳於中禁加以玄  
霜絳雪素能愈病一作疾拆醒顏惟賤庸承此恩造隕越無  
地惶悚失圖縱知死所豈答玄造載頒新曆永傳億萬斯  
年欣奉明時獲辨七十二候無任云

為王大夫謝恩賜口脂曆日狀 前人

右中使某至伏奉手詔慰拊臣及將士等又賜臘日口脂  
并新曆日等伏以清祀嘉名載於前典實追歡之盛筵亦  
和樂之良辰况天休光臨聖慈遐布顧臣賤陋竊奉明恩  
感戴周全不知所措蠲邪愈疾驗絳雪於仙方却老駐顏  
觀瓊膏於寶器式頒聖曆仰贊皇猷永為四海之尊更續



千齡之壽臣不勝歡躍云

爲人謝賜日脂等并曆日狀 令狐楚

右中使吳千金至伏奉勅書慰問臣并賜前件口脂臘脂紅雪紫雪各一合并曆日一卷等者伏以歲將更始節及嘉平陛下疑香爲膏聚藥成散頒日月於曆上奮龍鸞於筆端星分九天之使雲布一日之澤此誠無私之殊造均養之深仁而臣空抱愚忠曾無方畧一君藩鎮三度受恩朱奩忽開鮮膩與芳馨相雜素編旣列閨餘將分至不差披尋而齒筭延長塗傳而口容芳潤出雲之覆逾廣無以勝任綿地之封粗安未爲報效捧受嘗翫形神渙然無任感戴之至

謝賜臘日口脂紅雪紫雪曆日等狀 前人

右中使董文萼至伏奉詔書慰問臣并宣恩旨賜臣前件物等者臣伏以天書垂露御曆頒年靈膏有瓊液之容仙散擬雪花之狀司天推步定分至於四時尚藥煎和辨君臣於百品無不關於睿想發自宸衷下錫勳烈之臣猶無一作不過分幸霑庸微之質實所難勝况乏潤身之資欣蒙苦口之利謹當奉揚節候下告于萬人宣播光輝旁誇於九族殊私未答渥澤逾深夙夜寢興不任感戴

爲人謝賜男歲節料并口脂臘脂等狀 前人

右臣得男公敏狀稱伏奉恩旨賜歲節料麵兩石羊一腔酒五斗口脂臘脂紅雪各一合者臣謬以庸虛叨塵一作



任使陛下前因蜡日已降使臣既霑澤口之膏又賜雪煩  
之散一從捧受實未遑寧豈疲病小男復蒙寵賜一作酒  
漿口腹充溢於盃盤藥餌脂膏馨香于懷袖雖君父用賞  
延之義微細不遺而臣子非立功之人光輝斯極豈德澤  
之私於一物俾恩波之重若三山夙夜寢興以榮為懼戎  
守有限不獲陳謝無任感慶屏營之至

臘日謝賜口脂

集作狀

白居易

右今日蒙賜臣前件口脂集作蠟及紅雪澡豆等仍以時寒  
特加慰問者伏以時逢臘節候屬祁寒豈意聖慈不忘微  
賤念嚴凝而加之煦嫗慮皸疥而潤以脂膏集作喜嘉集作氣動  
申歡容發外挾續之恩甫及集作所勉和則體舒不龜之澤既

霑感而手舞臣等省躬懷此因物喻情豈止飲德營心集作  
唯集作驚寵賜必擬澡身勵集作即以答鴻私感躍之誠倍萬恒  
品謹具奏聞謹奏



校四十字

十月二十日

文苑英華卷第六百三十一

文苑英華卷第六百三十二

狀五

謝恩五

謝出餞宴狀一首

謝賜設狀四首

謝賜宴狀二首

謝賜食狀三首

謝賜酒脯等狀一首

謝賜人糧馬料狀一首

謝賜米麵狀一首

謝賜大麥麵狀一首

謝賜鹿狀二首

謝賜魚狀一首

謝賜蟹狀一首

謝賜車螯蛤蜊等狀二首

謝賜苳子狀一首

謝賜苳蔗芋等狀一首

謝賜茶果狀一首

謝恩命遣高將軍出餞狀

李邕



右高力士奉宣口勅以臣臨政特令賜宴恭承惠渥伏念庸微天地周仁木石知感不勝惶悚戴荷之極臣死罪死罪臣歷觀自古君臣凡所際會或因緣黨進或收接功成故未謁而知不言而信豈有地孤援寡毀衆謗深察蒙蔽之中致昭曠之外逢陛下特達之遇當陛下明聖之朝事出常均恩重今昔臣誓將瀝血足可竭誠徒欲殺身豈能報德至如勵精勤政舉直徇公副陛下憂人之心行陛下弘道之化豈一作安敢失墜以負神明但函關路懸長安日遠不任戀主悽悽之至

謝賜設狀

白居易

右今日守謙奉宣聖旨以臣初入院特賜設者臣生長窮賤才質孱微草野鄙夫風塵走吏豈期聖造推在禁闈煦以天慈賜之豐食集作賜以御食臣所以陵兢受命俯伏荷恩心魂不寧手足無措况罇開九醞筵集作饌列八珍惠過加邊榮優置醴金壘引滿將皇澤而共深玉饌屬厭與聖德而俱飽終食且歎捫心自驚戰汗慙惶隕越于下謹奉狀陳謝以聞謹奏

謝賜設及疋帛狀

前人

右今日高品劉全節奉宣進止集作旨以臣等在院覆策畢特加慰問并賜設及疋帛者臣等職在掌文詔令考策雖竭鄙昧猶懼闕遺豈意皇鑒下臨聖慈曲至惠加賜食榮及承筐寵厚縑緗仰難勝於玄貺恩深醉飽退有愧於素



食徒積慙惶何酬慶賜無任感戴屏營之至

謝賜設狀

元稹

右今日某乙奉宣恩旨賜臣就院設者臣聞推食之賜用勸勲勞置醴之恩以待賢彥微臣猥承天眷擢在內庭雨露頻施涓埃莫効陛下載分美祿特降珍羞空懷滿腹之慙未有沃心之鯁既充膚革誓竭肺肝竊位素餐實非誠願微臣無任感激恩私之至

為中丞榮陽公赴桂州長樂驛謝勅設狀

李商隱

右今日某日中使某奉宣進止集作就長樂驛賜臣及將吏等設饌者將承闔集作寄尚忝朝恩絡繹八珍芬芳九

醜臣階緣薄伎塵辱脩塗楊執戟之讀書雖無非聖董太中之對策何補清時忽委廉車乍離閨籍誠欣列土實耿辭天然猶食指告祥朶頤有慶爰於近驛式降貴臣酒自堯罇饌分禹膳集作下露將校旁耀路岐况臣平生本實孤賤懷書奉役久無黔突之謀入國展儀且惜殺蒸之禮飽期滿腹醉更憂心終虞負乘之災無報雲天之施臣與將吏等無任望闕感恩結戀屏營之至

九月九日謝恩賜曲江宴會狀 白居易

右今日伏奉進止集作賜臣等於曲江宴會特加宣慰并

賜酒脯等者伏以重陽令節大有豐年錫宴於無事之朝追歡於最勝之地况天厨酒脯御府管絃寵賜忽降於寰



中慶幸實生於望外仍加慰諭曲被輝華臣等各以凡才同參密職幸遇休明之日多承飲賜之恩樂感形骸歡容動而成舞榮集作澤均草木秋色變以爲春徒激丹心豈報玄澤謹奉狀陳謝以聞謹奏

三月三日謝恩賜曲江宴樂狀 前人

右今日伏奉聖恩賜臣等於曲江宴樂并賜茶果者伏以暮春良月元巳嘉辰巳集作獲侍宴於內庭又賜歡於曲水蹈舞踞地懽呼動天况妓樂選於內坊茶果出於中庫榮降天上寵驚人間臣等謬列近司猥承殊渥集作澤捧觴知感終宴懷慙肉食無謀未展涓埃之効素食有愧難勝醉飽之恩以此兢惶未知所報謹奉狀陳謝以聞謹奏

謝賜食狀 張九齡

右臣等面奉進止今就集賢院與諸學士等觀聖注道德經尋又賜臣等食竊味道腴兼承珍饌聞義飽德虛往實歸臣等何人叨承渥澤不勝惶悚感戴之至

謝每日賜食狀 常衮

臣衮言臣聞恩或曲存義不虛受故者儒碩德方載珍羞大節殊勲乃加禮食至於列曹分署各置食錢匪頒王褒食有公膳陛下勵精庶政垂意輔臣特降非常之慈屢蒙每日之賜上林果實至必先時太官殮罕送無曠日臣等自登三事已涉三旬當朝廷釐革之時佐海內安危之重入趨殿省常奉憂人之旨出在廟堂每思克巳之功而不



能陳一策進一賢外無平戎之謀內闕叙官之實四夷未  
格百姓未安不副憂勤合當罪累更承飲賜實用慚惶既  
招拆足之嫌將貽騰周易作騰口之誚伏望重回宸睠載允誠  
詞俯停三錫之恩伏免萬方之責則神明或祐官謗不行  
在微臣再受多福無任懇迫悚懼之至

代杜相公謝就宅賜食狀

劉禹錫

右高品某乙奉宣聖旨賜臣食者出自太官飲于私第光  
榮曲被猥承推食之恩駑蹇未施益重素飡之責舉其七  
筋若負丘山無任戰荷踴躍之至

為宰相謝恩賜酒脯餅果等狀

白居易

右中使某奉宣聖旨賜臣等前件酒脯二字集等俯優受

賜竦躍荷恩天酒來以分甘御餽集作降而示惠臣等省

躬知感因物言情寵過加遽懼多尸素之責榮同置醴慙

無麴蘖之功徒瀝丹誠豈酬玄造

代謝賜人糧馬料狀

此是讓狀英華誤編于此

于邵

右臣先奉恩旨賜前件人糧馬料初已陳讓不蒙允許臣  
昨日於延英對見又請前件糧數內停一千人糧聖情未

察倍增一作益惶懼臣自興兵已來早參戎律及討慶緒即

從先皇皆虔奉睿謀遂稱多難豈臣簿劣輒敢貪天而寵

遇特深封賞殊厚纏綿渥澤三十餘年食邑累加俸料甚

一作廣自此之外更有田園朝夕所須幸無闕乏不謂繼

明之始恩出非常曲賜褒崇霑此糧斛雖雲雨之施在恩



私而至極彼凋朽之質顧饕餮而多慙是以形神震駭不知所據懼悚顛沛以促餘年敢犯宸嚴重析哀亮僅蒙全度伏乞賜停謹奉狀云

謝米麵羊酒等狀

常袞

右中使其至奉宣恩命以至節恩賜米麵羊酒猪鹿及雜口味等者聖旨頻降榮賚過優以周官百品之珍載頒其實雖魏臣五金之貴豈容其多受賜踰涯拜恩失序臣出自孤賤素甘貧苦不過滿腹竊誠終身且祭不掩且飯惟脫粟昔聖之美其儉可師敢望豐盈重彰尸曠而雨露偏施歲時益榮俾奉先之饗味兼海陸合族之宴及於膏粱又沐深慈下霑中饋以感以慶啓處難任無德無功慙惶罔措不任戴荷兢惶之至

謝賜大麥麵狀

張九齡

右林招隱宣勅賜臣等招隱說云薦新之外自禁中所出皆是降至尊親耕稼穡之所成也伏以周人之禮唯有籍田漢氏之薦但聞時果則未有如陛下嚴祗於宗廟勤儉於生人事必躬親動合天德臣亦何幸近奉徽音又蒙聖恩猥垂珍錫已飽於聞義况霑此時羞綢繆渥澤未知報効死罪死罪仍望宣牒史館以示將來臣等不勝感荷之至

謝賜鹿狀

常袞

右中使邠國俊奉宣恩旨以前件鹿稍覺鮮好特以賜臣



者謬竊和羹之任累承分食之恩無補消塵叨一作霑兩  
露上載洪造內愧素食伏以陛下順時令以宣風展春蒐  
之彛典有司奉職上苑從禽將備御庖獻茲鮮獸宜供六  
膳以副八珍臣實無功何以受賜寵承殊渥味則非時顧  
調飪而空慙荷生成而何答無任感恩悚抃之至

爲晉公謝賜鹿肉狀

苑咸

右內品官史鳳節至奉宣聖旨賜臣鹿肉一盤捧戴殊私  
喜躍無地伏以十月農隙三泰歲成展豫離宮時巡近甸  
幸承扈蹕已荷陪遊之榮恩降自天更沐珍鮮之賜慶覃  
野次澤披私門顧螻蟻之至微仰丘山而何答無任感佩  
惶悚之極

爲晉公謝賜魚狀

前人

右內品官葉惠仙至奉宣聖旨賜臣魴魚一盤仍便令造  
羹伏以九天之使頻過衡門八珍之羞屢霑御膳登盤既  
榮於薦熟正席更喜於先嘗每侍軒墀曾無獻替歸休私  
室偏沐恩波空荷紅鮮之慈實負素食之責無任惶悚感  
戴之極

爲晉公謝賜蟹狀

前人

右中使焦庭望奉宣恩旨賜臣生蟹一盤便令造食臣自  
叨陪侍從累沐殊榮朝天賜浴於御湯退食每霑於仙饌  
賞隨恩積慶逐時新臣之何功偏承厚錫游泳溼澤但懼  
踰涯徘徊寵私無階答効無任望外荷戴之極



為晉公謝賜車螯蛤蜊等狀 前人

右品官葉惠仙至奉宣聖旨賜臣車螯蛤蜊等仍令便造

膳適中使賜臣水獮肉一合一作自濫陪巡幸累沐殊私每荷

沐一作天恩曾不踰日或承海味或降珍鮮况皆聖主傳芳

王人調飪薄効無裨於涓滴厚施轉積於丘山昔周美康

侯持霑蕃庶之錫漢崇張禹取單賜饌之榮才不逮於前

賢而遇每深於曩眷雖竭心盡節何答生成不任云云

二

右內官趙承暉至奉宣聖旨賜臣車螯蛤蜊等一盤仍令

便造趙承忠至又賜生蟹一盤高如瓊至又賜白魚兩箇

伏以衡門之下頻降王人簞食之中累承天饌適口之具

無時不霑駭目之珍每日幸一作遇顧循涯分何以克

徘徊寵私罔知攸答

謝恩賜甘子狀

于邵

右中使某乙至奉宣進止賜臣前件甘子伏以江潭所出

見重於南州苞茅入貢一作菁遠歸於北闕陛下念其野

次錫及微臣顧萍實以虛言非蔗漿之足擬分甘絕少遷

李陵甘子少英華作劣非竊荷於恩私食堪懷音敢忘於報効無任云

謝賜甘蔗芋等狀

常袞

右今月某日喬甘至奉宣恩命賜苑中所種甘蔗及芋等

其形豐其味甘曲被生成之恩宛同吳蜀之物過蒙頒錫

伏用驚喜陛下以萬靈効祉六合同風養之則生孰云其



遠化之自我不隔華夷將有絕域之人服中州而稟教故  
使他邦之產歸上苑而咸植既登天膳實表地成太和之  
理於斯可見捧承異貺兢跼素餐感戴之誠倍百恒品不  
任受恩悚懼之至

謝賜茶果等狀

白居易

右今日高品杜文清奉宣進止集作以臣等在院脩撰制

問賜茶脯梨果者集作茶果梨脯等曲蒙聖念特降殊私慰諭未

終錫賚旋及臣等慙深曠職寵倍驚心述清問以脩辭言

非盡意仰皇慈而受賜力豈勝恩徒激丹誠庶集作酬玄

造無任欣戴抃躍之至

文苑英華卷第六百三十二校正三十五字十月二十一日

文苑英華卷第六百三十三 狀六

謝恩六

謝賜衣服狀五首 謝賜春衣狀六首

謝賜冬衣狀六首 謝賜馬狀八首

謝集作賀侍講遍賜衣物伏 張九齡

右高力士至宣稱陛下親講讀毛詩遍賜侍講陳希列三

品兼賜衣物等伏以睿思玄通超然物表俯臨天下必樹

風化既弘儒教考覈詩人爰託師資親行講讀章句初畢

賞賜集作錫有加明主深恩集作誰集作孰不知勸臣謬承任

遇實愧經通聖業彌深微誠何補方思敦學以助皇明集作

明無任悅豫之至



謝賜衣服及絹狀

前人

右中使某至特蒙恩曲賜遠別之什又中使某宣口勅賜衣一副并絹一百疋者但柱礎雖下感致於青雲陽燧則微昭應於白日在臣孤賤亦荷寵光伏惟陛下御札龍躍入體比之未雄天文鳳章五色對之猶淺况束帛荐至衣服仍臻施重丘山恩深江海實為九族遍有光華匪唯賤陋獨稱榮慶不任云云

謝賜衣物狀

前人

右高力士宣勅賜臣衣及器物等臣九齡不孝苟存企及禮制天恩以忝樞近賜問再臨衣服玕器殊常寵錫臣有何力可以叨濫渥澤至深誠效已竭唯有微命不知所圖無任感戴惶悚之至

為盧監被盜衣物謝賜御衣物狀

蘇頲

內常侍趙元亨奉宣恩旨以臣被竊盜失物賜臣衣一副臣素以慢藏闕於周備令尹為過尚不可逃太丘有言復不能覺使臣知政未息盜於萑蒲加臣匪服遂增輝於樛櫟顧深憊咎翻荷恩慈捧戴循環再三惶懼無任下情之至

謝恩賜衣服狀

白居易

右今日守謙奉宣聖旨以臣初入院特賜衣服者臣自入禁司纔經旬月未申集作陳薄効累受殊私况前件衣服等獻自遠方降從御府既鮮華而駭目亦輕煖而使身臣實



何人堪此榮賜必擬秘藏篋笥傳示孫子何則顧陋質而  
懷慙貌非稱服撫微軀而荷罷力不勝衣因物感恩無任  
愧懼謹奉狀

謝恩賜春衣狀二首

崔行先

右中使某至伏奉勅書手詔宣慰臣及將士等兼賜臣春  
衣等鴻恩濡澤忽降轅門霧縠冰紉猥加介冑臣等謬膺  
委使徒展寸誠曾無逐獸之功每懼伐檀之刺捧受祗慄  
不知所裁仰戴恩光將何上答彌憂不稱其服益用內愧  
於心無任云

二

右中使某至伏奉勅書手詔宣慰臣及將吏等又賜前件

春衣臣等駑駘賤品介冑匹夫未彰塵露之功游及雲霄  
之澤喜抃兢惕恍然失圖捧戴恩私不知所擬以御府紉  
素耀晴景於三春天宮蘭麝襲回風於十步豈土水之質  
被服所宜雖灰粉其身上答何極無任云

同前

于邵

右今月某日中使某至伏奉勅書手詔慰諭臣及三軍等  
并賜臣及大將春衣者捧戴抃躍實增慙懼臣功效微淺  
罷遇日深霜露適濡恩已承於挾纊清明纔度賜又及於  
解衣仰服用於公家罷裁縫於私室已頒分大將訖各盡  
殫戎之力用申報國之誠

同前

常袞



右今月五日監軍某乙差行營十將其乙送正月十二日  
書詔并賜臣衣三副軍將二人衣二副跪伏捧承惶悚殞  
越臣素以愚懦昧於吏能虛受寵私豈堪任使謬承條察  
吏法非明忝司訓練戎行不肅今之曠職獨有微臣且懲  
冒榮以勵分鎮豈謂特廻聖睠俯示天書曲降宸慈載加  
墨詔下頒春服遠被時恩獎飾逾涯兢惶失次載光師旅  
仍錫偏裨誓以捐軀期於上報無任慶抃悚踴之至

謝賜春衣牙尺狀二首為人作

令狐楚

右中使某至伏奉詔書宣賜前件物臣伏以衣服者身之  
文章尺寸者王之律度被於四體不衷則災考以二分無  
差為貴伏惟皇帝陛下陶蒸萬類軌物兆人每及新春皆

頌上賞其或才堪國用智代天工福至而驚名成猶懼循  
省涯分比數藝能臣實無任累承斯寵曳紫光於腰下稱  
佩黃金操素質於掌中如持白璧窺看耀日舉止生風誠  
聖主全覆育之仁顧微臣無秉持之力蒙恩過厚忍愧逾  
深終申一寸之功用答九重之賜欣榮感惕不勝自任云

二

右中使駱元榮至伏奉勅書手詔慰問臣等并賜臣春衣  
二副牙尺一枝軍將衣二十副者臣伏以行慶于下惟德  
所廣受賞于上無功則難臣實何人叨居重任履冰非懼  
食檠為其今者伏蒙陛下推漢后解衣之恩寵錫春服稽  
有虞審度之典榮頒象尺樂官考正無累忝之差女御裁



縫有奪朱之麗而况端平皎潔無慙七寶輕盈綵繅不謝  
六銖此臣所以捧觀而似覩鈎衡服拜而如生羽翼謹便  
分散諸將傳示眾人感戴欣抃歡與臣同一作感戴欣所  
守有限不獲拜謝無任欣躍一作之至

謝賜冬衣表

權德輿

此表移在五百九十三卷表門今存其目

謝賜冬衣狀三首為人作

令狐楚

右中使宋文舉至伏奉勅書手詔慰問臣及將士等并宣  
恩旨賜臣等前件冬衣者臣伏以瓜牙之寄才實甚難衣  
裳之賜恩為至厚臣之氣質無所任用誠不足以膺重寄  
而蒙厚恩今陛下陶以大和蓋其多闕及戒寒之月屬授

衣之時喻一作倫比賢能頌宣慈惠跪聽清問欽承寵章

是蠶綿爛如獸錦長皆被土貴實兼金分列校不辨鮮華  
在微臣最為重疊自承天澤不憚風威仰戴恩光有千鈞  
之重俯循功績無一縷之微空知竭誠難以勝德謹並捧  
受分給訖所守有限不獲陳謝無任感慶屏營之至

二

右中使某至伏奉勅書手詔慰問臣及將士兼宣恩旨賜

臣等前件冬衣者伏以綸綽之言出於天澤衣裳之受必  
以王功臣職在總戎任當平寇効無絲髮非聖主而豈容  
施若丘山在愚臣而將壓今者司寒肇至命服載新降自  
九霄來經千里錯鳥章於襟帶奮龍文於素牋兼并縹緞



備極環竒木石之姿過蒙鮮飾冰霜之氣頓減嚴凝曳婁而賤質生光憤悱而懦心增勇終期薄効用答深恩謹準勅受兼分給諸將訖所守有限不獲陳謝無任感戴之至

三

右中使具千金至伏奉勅書手詔慰問臣及將士等并宣恩旨賜臣冬衣兩副及諸將衣二十副者臣守國之藩荷天之寵名聲績用未有可稱伏惟皇帝陛下仁育四方澤均群動當玄律開冬之候念初寒用事之初書詔交飛衣裘疊至墨畫龍蛇之妙綾兼龜鶴之竒服訖而衰殘有光拊循而孱懦增氣自臣而下萬口一聲臣並準勅分配訖不勝歡抃愧戀之至

為榮陽公謝賜冬衣狀

李商隱

右中使某至奉宣恩旨賜臣冬衣一副大將衣四副兼賜臣手詔一通者八行帝語宵降於重宵一襲天衣俯廻於窮節臣當時準詔給散訖臣叨蒙重寄適控遐陬地雖五鎮之衝氣得四時之正每玄冥應律顓頊司辰當二日之鑿冰則殊幽英華作幽野及兩楹之飛雪無具朔山重以寶布少溫蠶綿乏暖方求麗密以禦嚴凝豈望司服頒衣貴臣傳詔綾裁飛鵠絮集作素裏仙蠶白分板壁之光紫奪蘭牙之色已均下將仍逮連營晏子狐裘故弊何一作舊彰於國儉王恭鶴氅風流不自於君恩被服有輝負戴無力謹當上宣殊渥下拊多寒均大裙於瑯琊變無襦於蜀郡粗



令康泰以塞貪叨臣與大將等無任望闕感恩抃舞屏營之至

為濮陽公涇源謝冬衣狀

前人

右某月日中使某至奉宣聖旨賜臣及大將兼諸鎮防秋兵馬等前件勅書手詔并冬衣者臣並已準詔旨宣示給散訖恩極解衣榮加降蠶戴山未重負日非暄臣謬領藩垣適當戎狄唯憑廟筭粗展集作軍威絕漠集作獵迴幸無警急高烽火過但報平安直以地勢多陰川形稍背三伏常聞於屏遠九秋尋訝於垂繒代馬蹇嘶隄山無葉燕鴻未過涇水先冰是以每降王臣仍迂御筆緘封垂露罷錫禦冬非玉女裁成即仙人織出徒驚在筭莫匪集作因

針始顧辱微深懼不勝冠帶旋蒙被服便如能執干戈適逮軍前歷霑麾下達喜氣而陳根復秀動歡聲而輶戶潛開華楚成行曳婁塞路其山南宣歙三道大將等雖久居炎燠不慣嚴凝亦既更衣皆忘易地賈餘勇而例思盡敵感鴻私而咸願殺身各限征行不獲陳謝臣與大將等無任瞻天戀闕感恩屏營之至

謝賜冬衣狀二首

張次宗

右伏以玄律戒時祁寒應候玉人傳詔御府頒衣伏惟皇帝陛下盛德御天至仁育物每念藩方之任屢加寵錫之恩臣績効未施塵忝茲久捧溫密之詔喜若朝天被輕織之衣暖同就日况撫寒之間下及師人錫服之榮遍周戎



校喜氣乍傳於封部陽和先及於荆衡爭馳戀闕之誠各  
勵酬恩之至云

二

右中使劉泰伸至伏奉勅書手詔宣慰臣及將吏僧道百  
姓等并賜臣手詔及冬衣兩副大將衣十副者清風戒寒  
玄律將至未及嚴凝之候已霑輕煖之衣承寵命而載慙  
啓緘封而增感伏惟皇帝陛下至德御時深仁育物光武  
十行之詔每覩憂勤魏后五時之衣未爲寵錫况臣叨榮  
漸久受賜彌多寒暄之節候驟移新舊之光華相委被服  
悉頒於御府裁縫僅度於私家挾纈之恩已周於列校緘  
鷄之刺尤媿於微躬無任云

謝賜馬狀

張九齡

右今日高力士奉宣聖旨賜臣紫騮馬一疋伏以恩覃不  
次寵遇非常有忝股肱之臣頻奉渥注之賜况郊壇展禮  
尚未奠於九宮而雨露深恩反有叨於三接雖鳴珂噴玉  
朝天未代於臣勞而任重才微久歲寧酬於聖造荷負無  
力答効何階云

謝借馬狀

孔戣

右中使至奉宣進止將前件馬送臣至京兆路界祇承寵  
光載兢載惕微臣猥以庸瑣謬分憂寄拜命之日已受賜  
於龍媒遵路之時復假榮於天驥恩私稠疊渥澤殊常豈  
謂聖意不遺獨懷軫念輟驂駟於內廐駛逸步於長衢驅



效苑英華 卷五  
馳忘勞服習如志誓當夙駕奔走所部冀安夷獠以免聖  
憂無任感恩懇款之至

謝借飛龍馬二疋狀

鄭綱

右中使某至奉勅旨借臣前件馬至京兆府界者王人在  
門天驥臨路寵光荐及行色增輝上感恩私何階答効自  
臣叨承戎寄累軫皇慈念輸力於外藩降逸才於內廐分  
憂未酬於聖主代勞已及於微臣雖駑鈍莫施而疲羸頓  
解再馳猶勤於遠道三接已及於帝畿即以某日至京兆  
府界迴瞻魏闕目斷白雲祇事正程指期丹激無任感戀  
之至

謝借馬狀

于邵

右今日中使某至以臣朝奏闕廷特借前件馬拜受殊深  
不任驚懼伏以詔傳中貴馬出內閑恩光自降於九重前  
疑作飾不關於衆口無功無効以懼以慙遂躡權竒方遺  
欵段瞻天心喜已馳捧日之誠向闕身輕更遇奔星之足  
仰丘山而轉重知報効以何階

謝賜馬狀

常袞

右中使某奉宣恩旨賜臣前件馬臣竊位台司已招官諉  
未申薄効遽沐殊私捧荷驚惶心魂震越上慙慈睠下愧  
周行素無遠致疑作致遠之資益懼負乘之咎無任感戴之至

為趙相公謝馬狀

齊映

中使某至奉宣進止賜臣馬一疋并鞍轡者臣官叨上司



日荷厚俸固其乘馬足展驅馳宸睠過深聖慈猶軫猥出  
上駟特賚微臣豈徒體合鑄金法相皆備而乃足符歷塊  
驥德是稱仍束以銀鞍絡以金轡顧自微賤何可服乘拜  
命驚惶不勝戰汗當攬轡之際思六合於如琴執鞭之辰  
度三代之得策空懷夙夜寧効涓塵無任感激之至

爲段相公謝借飛龍馬狀

白居易

伏以出從內廐行及中途假飛龍之駿駒代跛鼈之蹇步  
執鞭拜命借馬喻身取其戀主之心以表爲臣之節恩深  
易感情懇難陳竦踴之誠倍百群品

爲中丞滎陽公謝借飛龍馬送至府界狀

李商隱

右中使某奉宣恩旨以臣赴任特借飛龍馬一集作疋并  
轡轡等送至京兆府界者臣謬奉恩榮出叨廉問豈期蹇  
步深軫皇慈特命內臣俾騰上駟梁懸蜀鎰几覆吳鞍每  
多曳練之疑不假着鞭之力倏踰秦甸將復周閑照地廻  
光瞻天送影長亭欲別未期東道而來雙闕儻嘶願附北  
風之思無任感恩戀闕雪涕屏營之至



校四三十八字

十月二十二日

文苑英華卷第六百三十三

謝恩七

狀七

謝賜宅狀二首

謝賜內園花藥狀一首

謝賜冰狀一首

謝賜弓箭狀一首

謝為宰相賜吐蕃信物狀一首

讓勅賜蕃口狀一首

謝賜毯價絹狀一首

謝賜尺詩狀一首

謝賜撰鄭夫人碑羅絹狀一首

謝賜宣行哀冊文狀一首

謝令撰田弘正碑文狀一首

謝許受常丹送撰碑練絹狀一首



集賢謝示道經狀一首

謝御書大通禪師碑額狀一首

謝賜寺額狀三首

為五臺僧謝賜袈裟狀一首

為薛安謝賜宅狀

于邵

右件宅先賜臣亡弟嵩比緣空閑臣遂權住某月日中使  
甚至奉宣進止轉以賜臣并勅所司改給公驗臣素空行  
藝父遭扞脇疑作陛下特存要領更齒班榮以非常之恩  
以超等之賜自典環列職在警巡歲月徒深消塵罕錄豈  
謂叨承後命曲被殊私賜以蔭庇之地未為子孫之業生  
輕施重內省知慙捐軀報德實臣志願無任感戴

代謝賜未崇宅并賜酒食錦綵器物等狀前入

右今日中使某至伏奉恩旨令臣移入所賜宅并賜前件  
者慈旨曲隆驚抃難容臣以微生幸逢休運上公政本既  
荷殊私理第頒田特超恒數且若爽愷又賜歡娛芳膳出  
於天厨喜疑作賓傾於朝彥金石諧座珍奇爛庭况棟宇  
輪囷近加朽填林塘秘邃潛蓄清涼素以衡茅特驚弘敞  
周履既增於魂悸眴眴殊覺於心慙臣實何人遭茲多幸  
飲恩知愧受賜輕生誓將灰粉百身償國家之恩遇拂磨  
一劍弭一作兇醜於邊疆區區寸誠仰答萬一不任戴荷  
之至

謝內園果栽并令府縣供花藥狀疑是代郭前人



右臣得男曜狀稱伏奉聖旨緣臣莊栽時賜內園果樹又  
令府縣與竹及同栽花藥等今月十日仍令開府魚朝恩  
已下到莊檢校者謬承天眷累沐恩私事有至微亦關聖  
慮顧唯別業封植未成特降明命賜臣其木移根上苑擢  
秀中園發輝池館之勝實荷生成之力侍臣中貴接武員  
來虛落生光里間增慶况內園所賜品類已多府縣更供  
竊憂煩擾在臣諸已先有不敢重此勞人望停府縣所供  
曲遂微臣至願無任云云

謝賜冰狀

白居易

右今日奉宣聖旨賜臣等冰者伏以頒冰之儀朝廷盛典  
以其非常之物用表特異之恩况春蒸之薦時始因風出  
當夏蟲之疑日忽自天來煩暑迎銷清涼集作涼飈隨至受此  
殊賜臣何以堪欣駭慙惶若無所措但一飲之慄慄常傾受  
命之心捧之兢兢永懷履薄之戒以斯惕勵用答皇恩集作  
茲謹奉狀陳謝以聞

代人作昭應獵謝賜弓箭狀

于邵

右中使某至伏蒙賜前件弓箭跪捧殊私抃躍無地伏以  
彤弓出彘利鏃離方月滿星流皆承御物摧剛服猛便假  
天威慙無矯控之能庶盡追擒之狀無任云云

為宰相臣謝恩賜吐蕃信物銀器錦綵等狀

白居易

右臣等材愧庸虛職叨輔弼遇天下削平之日當西戎即



叙之時遂使殊方致茲遠物此皆率由玄化感慕皇風人  
臣既絕外交問遺敢為集作已有今蒙重賜益荷聖慈况  
來自外夷知德廣之所及降從中旨仰恩深而不勝感戴  
悚惶倍萬恒品

讓勅賜蕃口狀

此是讓狀英華誤編于此

張九齡

右高力士宣聖恩賜臣等蕃口執訊自邊釋因為隸誠宜  
供國次及賞功臣等無庸以何集作受賜殊恩俯逮集作  
循涯自失伏望俯停渥澤存以至公矜遂懇誠許歸官寺  
則上有無偏之道下無苟得之責無任悃欵之至

謝賜毯價絹狀

令狐楚

右監軍使李輔光廻奉宣恩旨賜臣前件絹者臣當道比  
年未豐經費不足懼乏供億慙無智能陛下敦燭幽之光  
垂逮下之德絲綸既出縑帛員來數至累千價盈巨萬廣  
狹中量鮮明如冰足以贍三軍之賜予充百工之餽廩捧  
受欣抃不知所裁無任云

謝賜尺詩狀

張九齡

右今日高力士宣勅賜臣等御製詩并寶尺伏以尺者紀  
度之數宜麗天文詩者律呂之和是生節物聖恩下逮天  
旨旁流因物寓言以言垂象臣雖瞽陋伏見宸衷竊謝良  
工徒秉刀尺終期死力取配鈞衡而未副所圖退省知罪  
臣等不勝負荷感懼之至

謝賜撰鄭國夫人碑羅絹狀

張說



右內侍尹鳳祥宣口勅得所進闡羊表及鄭國夫人碑今賜卿綵羅二十疋絹一千疋闡羊薄伎恩感戰士之心雕蟲陋詞媿稱賢母之德効輕賞重戴厚慙深臣子之情豈望天報

謝宣行哀冊文狀

令狐楚

右臣先準勅撰成封進訖奉某月日勅旨敬依典禮不任號慕者伏以範天地之大者難為狀鑄金石之堅者難為工况先皇之武烈文明迴超前古而微臣之警言惜學不及中人顧惟庸虛謬獲紀述叨蒙恩獎特賜宣行竊文士之名誠有慙色彰聖人之德實荷經綸云云

謝準朱書撰田弘正碑文狀

元稹

魏博節度使李烈請與田弘正立德政碑右臣伏準集作奉

本月二十四日勅令臣撰前件碑文伏以田弘正首變魏

俗彰先帝之睿謀近入鎮州宣陛下之神武積成忠懇大

有勲勞人懷去思願刻金石陛下所宜外詔台席內委翰

林妙選雄文式揚丕績豈謂天光曲照御札特書猥付微

臣實非常例且臣頃以特恩拔擢便欲効死仰酌遂竭愚

誠累蒙召對自去年九月以後橫遭謗毀無由集作因再覩

天顏分隨枯朽而凋末絕恩波之望豈料聖慈長在記憶

姓名無人奏請撰碑便自宸衷宣付微臣忝非木石粗有

肺腸集作肝空懷感激集作涕之心未獲殺身之所無任感恩

思報鏤骨銘肌之至云云



謝許受江西送撰常冊碑綵絹等狀 杜牧

右今月十六日集作九中某至奉宣聖旨令臣領受江西觀

察使訖于衆所寄撰常冊遺愛碑文人事綵絹共三百疋

恩隨幸至榮與利弁抃躍慙惶罔知所措伏惟皇帝陛下

皇天縱聖赫日資明大獎功勞不計存歿舉常冊江西之

績特令微臣撰碑墮淚之恩豈慙羊祐黃絹之妙實媿蔡

邕今者更蒙恩私廣受綵帛捧戴兢惕無地容身不勝感

恩慙惶之至

集賢院謝示道經狀

張說

右臣伏見聖札金字八分寫道經兩卷以為惠文太子三

七追福天毫發彩宸翰騰輝色器風雲光逾日月伏惟陛

下孝悌之至通於神明俯念天倫用資幽贊當茲炎暑服

此勤勞事絕古今感深名教臣忝司舊職載考前王未有

親親之至楷隸之美如此之備也足以作則貽範垂之無

窮伏望宣付史館以光典策無任誠懇慙惶之至

謝賜御書大通禪師碑額狀

前人

右內侍尹鳳祥宣示御書大通禪師碑額六字畫起平雲

點蹲芒玉戈茅攢倚鸞鶴交飛神功發於至想睿思成於

玄德實謂天龍捧持虛空稱贊逝者如在荐福知歸臣栖

志禪門撰碑靈塔幸遇聖情崇道仙書假貸刻星辰於嘉

石爛日月於封丘感極悲生恩深無答臣無任望外殊澤

之至



謝賜天寶寺額狀

釋嗣安

右臣會覺等言臣聞皇天以平分四時聖人以亭育萬物僧等何幸頓沐殊私但以王者封畿乃稱鄠杜之邑諸侯近甸是惟鄠鎬之濱頃者靈符發兆聖號輝煥百神慶答萬國惟新不謂惠澤旁流降仙毫之瑞札宸慈下被賜天寶之嘉名普潤緇黃齊霑寺觀而魚龍起伏來從日月之宮束帛交交更賁金繩之界雙林戴色緝苑增榮臣等不勝抃躍之至

謝賜貞元寺額狀

崔行先

潞府羅城南面臣故使李抱真先用料錢脩置山亭并改造立五龍神院等

右臣昨奏前件亭子及五龍院等伏望天恩賜額為寺於當府抽有道行僧二十七人住持脩理為國崇福者伏奉勅旨允臣所奏賜額為貞元寺者特沐殊私俯遂愚懇採實曆之二字開浮域之一名演皇劫無窮之期示蒼生廻向之路莫大之福實在於斯且上黨古郡先皇舊藩星辰曾降於謳謠符瑞見存於圖諜昔為盤石之地新作布金之園廣梵宇於城中資聖祚於天上闔鏡臣庶歡抃難勝臣忝列藩維戴荷何極

謝賜僧尼告身并華嚴院額狀

令狐楚

右中使王進卿至奉宣恩旨賜前件僧尼告身并院額等臣伏以有為功德莫大於化人無上菩提亦先於奉國



臣以前因慶誕輒貢敷陳期降福於上天庶効祥於今古  
 伏蒙陛下用至真之印轉不退之輪罷錫僧名榮頒院額  
 仰窺金榜跪捧瑤緘寵翥四維鸞迴三點憑大悲之力便  
 至道場承上聖之仁必成菩薩光生十地歡動一方荷天  
 眼之昭一作照明願法身之清淨所守有限不獲陳謝無任  
 欣戴之至

為五臺山僧謝賜袈裟等二首 前人

右中使蘇明俊至奉宣聖旨賜臣巾襪香茶念珠袈裟等  
 伏以推恩之義法雨露而必均受施之深一作心戴丘山而  
 不墜伏惟皇帝陛下為人心印得佛髻珠垂衣于空寂之  
 門倒疑於清涼之境每因令月常降信臣輦珍寶於九天

散芳馨于十地巾裁吳紵靡不輕盈帔齊統無非麗潔  
臣某等名非長者跡在凡夫既結襪以經行又焚香而宴  
 坐啜楚山之新茗煩惱頓除持越海之名珠聖賢可數而  
 煎和百品週遍萬僧覩奕葉以重光知分畦而疊慶豈大  
 雄慈悲之力盡上帝福德之田誓當潔已禱天虔誠報國  
 以無疆為聖壽以常樂為昌期長承覆護之仁水助清平  
 之理限以脩習不獲匍匐陳謝無任感戴之至

同前

前人

右中使蘇明俊至奉宣聖旨賜前件袈裟蓮子念珠等物  
 均散五臺山諸寺伏以稻畦可製降自九天蓮葍親規生  
 於八水或光浮眼界或香滿鼻根豈意凡夫今蒙罷錫山



積於樓臺之下無不裝嚴雲散于林嶺之中悉皆週遍咸承覆露孰不欣榮誓將傳印之功以助垂衣之慶謹並準勅分散訖無任感戴之至

校四十六字

十月廿二日

文苑英華卷第六百三十四

文苑英華卷第六百三十五

狀八

賀上

賀冊尊號狀二首

賀冊皇太子狀三首

賀降誕日德音狀一首

賀聖躬痊復狀二首

賀順宗謚議狀一首

賀論三教狀一首

賀西幸改期狀一首

賀冊尊號狀

孔戣

右臣聞唐德格天列聖垂祐裕必紀名號以彰治明功伏惟

元和聖文神武法天應道皇帝陛下績戎十聖時乘六龍

躬一德而善繼丕承肇有形而天覆地載既休武力方用

文經遺步驟於殷周振聲容於華夏既而天人合應億兆



叶心探至道於邦家之先揭鴻猷於疆名之域陛下初遠  
群議方守謙光旋體至公遽廻慈眷德意既隆盛禮將陳  
凡在品彙無任幸甚臣以待罪遐徼不獲稱慶闕庭徒勤  
子罕江海之心有同太史滯留之日無任歡抃之至

賀冊尊號表

英華作  
狀非

韓愈

此篇當在五百六十九卷表門今已移入姑存其目

百僚賀冊皇太子表

英華作  
狀非

柳宗元

此篇當在五百十七卷表門今已移入姑存其目

爲崔大夫賀冊皇太子狀

孔戣

臣聞帝皇立極必建儲貳俾承宗祧所以祇奉棗盛永固  
社稷者也伏惟睿聖文武皇帝陛下積德承業光有天下

思正國本以和人心載考春秋之義以明君臣之道主茲  
七鬯允屬元良推明至公振舉舊典皇太子體仁秉哲既  
嫡且賢溫文發中孝友聞外欽若不訓允膺冊禮陛下將  
嗣十聖之休烈垂百代之懿範大備禮物廣設明庭陰氣  
方晦而忽銷旭日旣昇而增朗夷夏胥悅神祇克諧足以  
包夏孕商跨周軼漢夫何晉魏以降易置瓊瓊不足侔此  
盛禮旣畢洪恩又洽恤刑議獄旌善賞勞禮問高年存恤  
疾隱皇王之德於茲備矣臣忝列近侍親承睿謨抃蹈之  
切不任愚懇云

爲鄭尚書賀冊皇太子狀

令狐楚

臣聞於宣政殿冊皇太子訖伏以建崇儲位光啓春闈萬



方以貞九服同慶伏惟皇帝陛下誕敷聖訓光啓天慈咸元貞於國經鍾福慶於邦本皇太子温恭表德仁孝因心方毓質於龍樓肇增輝於望苑臣戎守有限不及蹈舞稱

賀云

賀降誕日德音狀

元稹

右臣等伏奉今日勅旨集作書以降誕之辰奉迎皇太后宮

上壽獲申歡慰宜集百寮及外命婦進名賀皇太后仍御

光順門內殿與百僚相見便求為常式者伏以降集作誕聖

嘉辰承天令節新恩肇降品彙咸休皇太后念樞星之祥

重遊甲觀群執事排閭闔而入盡唱賡歌同霑就日之榮

實慶普天之樂况百官集作寮承式萬歲傳呼求為利見之

規彌荷無窮之澤臣等謬參樞務親奉德音慶抃之誠俯

萬常品無任鼓舞歡呼之至

李令公賀聖躬痊復狀前篇作表已見五百六十九卷于公具

平和前篇作康平上天前篇作自天坐朝前篇作求衣之事前篇作之任任於

藩臣前篇作彼戎臣其餘所司責成各有常務臣蒙國榮輒露丹

懇伏惟察納表臣愚忠無任感激屏營之至前篇作從容

化為宗社自愛委諸有司幸甚臣蒙國寵榮輒露誠懇伏惟察納表臣愚忠

為大夫安平公華州進賀皇躬痊復物狀

李商隱

右臣聞藩方舊德臣子私懷將稱慶於天朝必展儀於土

貢伏惟皇帝陛下道苞乾象德總坤靈肇自元正載康福

文低一格



履九廟不忘於繼志兩宮無闕於問安鼓舞萬靈波傳四  
國驗推測則咸如周卜聽祝詞而皆若華封臣坐擁伏熊  
行驅畫準值一人之有慶當春日之載陽心但葵傾跡猶  
匏繫伏蒲之覲謁未果獻芹之誠懇空深况又地邇宸居  
俗薰儉德更無玉帛以率梯航前件石器等瑞匪土矧珍  
慙甌磬並取諸地產皆以勒工名杖苓伏神等品載仙經  
竒標藥錄通靈祛疾不唯色若凝脂延壽安神豈是心如  
枯木干冒陳進無任兢惶云

賀順宗謚議表英華作狀非

令狐楚

此篇當在五百七十一卷表門今已移入始存其目

賀論三教狀

張九齡

右伏奉今日墨制詔諸學士及道僧講論三教同異臣聞

好向之論事蹟於偏集作萬方至極之宗理歸於一貫非夫

上聖孰探要旨伏惟陛下道契無為思該玄妙考六經之

同異筌三教之幽蹟將以降照群疑敦集作敷化率土屏浮

詞於玉殿緝經集作精義於金門一變儒風再揚道要凡百

士庶集作庶士非罔不知歸臣等幸侍軒墀親承至訓抃躍之

極實倍恒情望宣付史館謹奉狀陳賀以聞

賀西幸改期狀

前人

右臣等今日面奉進止西幸有日般運已去仍聞京畿百

姓猶有未安儻來歲非熟下無所向集作下人無向朕雖至彼復

有何情欲延期至來冬待看穀麥卿等商度以為何似臣



等具奏洛陽城闕雖曰皇都至於宮苑之間制度本狹然風土氣候不甚宜人陛下以萬姓為心萬姓以陛下為命億兆所繫誠在聖躬聖躬若安何顧小小陛下遂當寧動色再降德音苟利於人朕何顧惜發言惻隱感動神祇臣等幸聞至言不覺承曉聖恩愛育遂及於此又勅臣等商量進來者湛恩至德焉可使朝野不知聖恩君鴻名不可令史官無述臣望宣聖旨改用來年十月幸西京仍望具將本狀遍示朝列并宣付史官臣等不勝感戴踴躍之至

校正十九字

十月二十二日

文苑英華卷第六百三十五